

## आकाशवाणी जयपुर—अजमेर

### प्रादेशिक समाचार

- प्रदेश मांय राज्यसभा उप चुनाव सारू तीन उम्मीदवार पर्चा दाखिल कीना—भारतीय जनता पार्टी री ओर ऊं रवनीत सिंह ई पर्चो दाखिल कीनो ।
- अनुसूचित जाति—जनजाति रा उम्मीदवारां ने सरकारी नौकरियां मांय आरक्षण रा बारा मांय सुप्रीम कोर्ट कानी ऊं दिया ज्या फैसला रे खिलाफ बुलायी ज्या भारत बंद रो प्रदेश मांय मिल्यो—जुल्यो असर ।
- प्रदेश रा हड़ताल कर रह्या रेजीडेन्ट डॉक्टर आपातकालीन अर आईसीयू सेवावां सारू काम माथे आवण बाबत् राजी व्ह्या ।
- राज्य मांय चौमासा री ई रूत मांय हाल तांई औसत ऊं 44 फीसदी बत्ती बिरखा व्ही— 192 बंधा पूरा भर्या ।

000

प्रदेश मांय राज्यसभा उप चुनाव सारू तीन उम्मीदवार पर्चा दाखिल कीना है । आज नामपाना दाखिल करण री आखिरी तारीख ने भारतीय जनता पार्टी रा उम्मीदवार केंद्र सरकार मांय राज्य मंत्री रवनीत सिंह नाम पाना रा चार सैट दाखिल कीना । वे विधानसभा भवन मांय मुख्यमंत्री भजन लाल शर्मा, उपमुख्यमंत्री दिया कुमारी अर प्रेम चंद बैरवा, संसदीय कार्यमंत्री जोगाराम पटेल अर केई आला नेतावां री

मौजूदगी मांय निर्वाचन अधिकारी सामी पर्चो दाखिल कीनो। पर्चो दाखिल कर्यां पाछे रवनीत सिंह खबरनवीसां सागे बातचीत करता थकां कह्यो के अब पंजाब सागे राजस्थान ई वां री कर्मभूमि बणबा वाळी है अर वे प्रदेश रा विकास मांय कोई कसर नी छोड़ेला।

राज्यसभा उपचुनाव सारू पर्चो दाखिल करण रो आज आखिरी दिन हो। आज ई भारतीय जनता पार्टी री ओर ऊं डमी उम्मीदवार रा तौर ऊं सुनील कोठारी ई पर्चो दाखिल कीनो। ध्यानजोग है के प्रदेश ऊं राज्य सभा री एक रीती सीट सारू व्हे रह्या उप चुनाव मांय पर्चो दाखिल करण रा आखिरी दिन आज ताई तीन उम्मीदवार नाम पाना दाखिल कीना है। 17 अगस्त ने निर्दलीय उम्मीदवार बबीता वाधवानी ई राज्य सभा उप चुनाव सारू पर्चो दाखिल कीनो हो। कांग्रेस या दूजी किण ई सियासी पार्टी री ओर ऊं नामपानो दाखिल नी करी ज्यो है। दाखिल करी ज्या नामपानां री काल जांच करी जावेला। उम्मीदवार 27 अगस्त ताई नाम पाछा ले सकेला। ज़रूरत पड्यां 03 सितम्बर ने वोट पड़ेला अर वां ई दिन वोटों री गिणती करी जावेला।

000

सरकारी नौकरियां मांय अनुसूचित जाति—जनजाति रा उम्मीदवारां सारू आरक्षण रा बारा मांय सुप्रीम कोर्ट रा लारला दिनां दिया ज्या फैसला रे खिलाफ आज राख्यी ज्या भारत बंद रो प्रदेश मांय मिल्यो—जुल्यो असर रह्यो अर अमूमन शांति रही। राज्य मांय घणखर ठौड़ां बाज़ार बंद रह्या, हालांकि आपातकालीन सेवावां ने बंद ऊं न्यारी राख्यी ज्यी ही। राजधानी जयपुर मांय बंद ने ध्यान राखता थकां मोटी तादाद मांय पुलिस जाब्तो तैनात करी ज्यो हो। शहर मांय न्यारी—न्यारी ठौड़ां अनुसूचित जाति—जनजाति तबका रा लोग रैलियां निकाळ र प्रदर्शन कीना। झालावाड़ मांय खेल संकुल रा सामी ऊं सरू व्ही रैली मिनी सचिवालय पूग र अहलकारां ने पानड़ी सूंपी।

चूरू, टोंक, भरतपुर, बाड़मेर, जालौर अर भीलवाडा समेत न्यारा—न्यारा शहरां मांय जुलूस निकाळी ज्या अर प्रशासनिक अहलकारां ने राष्ट्रपति रे नाम पानड़ी सूंपी ज्यी। खबरनवीसां सागे बातचीत करता थकां पुलिस महानिदेशक यू आर साहू कह्यो के पुलिस अर प्रशासन कानी ऊं करी ज्या माकूल इंतज़ामात रे कारण राज्य मांय छुट—पुट वारदातां ने छोड़ र सगळा ज़िलां मांय शांति सागे बंद राख्यी ज्यो।

000

देश भर मांय 23 अगस्त ने राष्ट्रीय अंतरिक्ष दिवस मनायो जावेला। ई मौके नई दिल्ली रा भारत मंडपम मांय राख्या जावण वाळा खास जळसा रो उद्घाटन राष्ट्रपति द्रौपदी मुर्मू करेला। ई साल इण रो मुद्दो चंद्रमा को छूते हुए जीवन को छूना : भारत की अंतरिक्ष गाथा है। अंतरिक्ष राज्य मंत्री डॉ. जितेंद्र सिंह आज खबरनवीसां सागे बातचीत करता थकां आ जाणकारी दीनी। वे कह्यो के लारला साल इण ई दिन चंद्रयान-3 मिशन रा तैत लैंडर विक्रम चांद री सतह सतह माथे हिफाजत सागे उतर्यो हो। वे कह्यो के ई सागे ई भारत चांद री सतह माथे उतरण वाळो चौथो अर चांद रा दक्षिणी ध्रुव माथे उतरण वाळो पहलो देश बण ग्यो हो। डॉ. सिंह कह्यो के भारत री अंतरिक्ष अर्थव्यवस्था आवता दस साल मांय पांच गुणा बध र करीब 44 अरब डॉलर री व्हे जावेला।

000

पश्चिम बंगाल री राजधानी कोलकाता मांय एक महिला रेजीडेंट डॉक्टर सागे व्ही वारदात पाछे लारला एक सप्ताह ऊं बत्ता बगत ऊं हड़ताल कर रह्या राज्य रा रेजीडेंट डॉक्टर अब आपातकालीन अर आईसीयू सेवा देवण सारू तैयार व्हे ग्या है, हालांकि अ डॉक्टर ओ.पी. डी. समेत दूजा सामान्य कामकाज करण सारू हाल ई राजी नी व्ह्या है। चिकित्सा विभाग रा अहलकारां अर रेजीडेंट डॉक्टरां रा नुमाइन्दां बीचे आज व्ही बातचीत रे दौरान कुछ मुद्दां माथे सहमति बणी। बातचीत पाछे चिकित्सा अर स्वास्थ्य मंत्री गजेंद्र सिंह खींवर बतायो के आपातकालीन अर आई.सी.यू. मांय रेजिडेंट डॉक्टरां री सेवावां मिलण ऊं जनता ने साता मिलेला। चिकित्सा अर स्वास्थ्य विभाग री अतिरिक्त मुख्य सचिव शुभ्रा सिंह कह्यो के डॉक्टरां री हिफाजत अर अस्पतालां मांय वां ने चोखो माहौल देवण सारू सरकार न्यारा-न्यारा जतन कर रही है।

000

टोंक जिला मांय मोहम्मदगढ पंचायत रा रघुनाथपुरा गाँव मांय चार बच्चां री पाणी मांय डूब जावण ऊं मौत व्हे गयी। गाँव रा पांच टाबर भेस्यां ने पाणी मांय ऊं काडण सारू उतर्या हा, ज्यां मांय ऊं एक बाळक तरतो थको पाणी ऊं बाहर निकळ सक्यो। अ टाबर एक दूजा ने बचावण री जुगत मांय गहरा पाणी मांय उतर ग्या ज्यीं कारण डूब

जावण ऊं वां री मौत व्हे ग्यी। पुलिस लाशां ने उनियारा रा अस्पताल पूगायी ज्यां ने पोस्ट मार्टम पाछे पिरवार वाळां ने सूप दीरीजी। डूंगरपुर जिला मांय धम्बोला जीएसएस कने तेज रफ़तार ऊं जा रही कार री फेंट मांय आ जावण ऊं मोटरसाइकिल सवार दो जणां री मौत व्हे ग्यी जद के एक जणो घणो ज़ख्मी व्हे गयो। धम्बोला थाना पुलिस मामला री जांच कर रही है। झालावाड ज़िला रा झालरापाटन मांय चन्द्रभागा नदी मांय नहावण सारू गयो एक जणो पाणी मांय डूब गयो। एसडीआरफ रा गोताखोरां री टीम वां री तलाश कर रही है।

000

जैसलमेर ज़िला रा रामदेवरा मांय आज भादवा री अंधारी बीज रे मौके जातरु खास पूजा-अर्चना कीनी। ई मौके मोटी तादाद मांय जातरु बाबा रामदेव री समाधि रा दर्शन कीना। मेला परिसर मांय पुलिस री नफ़री बधा दीरीजी।

000

अजमेर रा हैड पोस्ट ऑफ़िस मांय आज "डाक सेवा चौपाल" लगायी ज्यी। ई दौरान जनता ने न्यारी-न्यारी सरकारी योजनावां रा बारा मांय जाणकारी दीरीजी।

000

राज्य मांय चौमासा री ई रूत मांय हाल ताई औसत ऊं 44 फीसदी बत्तो पाणी बरस्यो है। मौसम विभाग कानी ऊं मिली जाणकारी रे मुजब ई दौरान प्रदेश रा आतूणी जिलां मांय 71 फीसदी अर ऊगणी जिलां मांय 27 फीसदी बत्ती बिरखा व्ही है जद के प्रदेश रा 23 जिलां मांय घणी बत्ती बिरखा व्ही है। 13 जिलां मांय औसत ऊं बत्तो पाणी बरस्यो है। ई साल एक जून ऊं हाल ताई 8 जिलां मांय सामान्य अर 6 जिलां मांय औसत ऊं कम बरसात व्ही है। जल संसाधन विभाग रे मुजब प्रदेश मांय हाल ताई बरस्या मेह ऊं बंधां

मांय भराव बूता रो करीब 61 फीसदी पाणी आ ग्यो है। ई दौरान कुल 691 छोटा—मोटा बंधा मांय ऊं 192 पूरा भर ग्या है जद के 340 बंधा थोड़ा—घणा भर्या है। ई बीचे प्रदेश रा केई जिलां मांय आज ई चोखो मेह बरस्यो। डूंगरपुर अर भीलवाड़ा जिलां मांय दोपहरां पाछे तेज बिरखा व्ही। जयपुर रा केई हलकां मांय ई आज हल्की बारिश व्ही। दौसा मांय ई लगातार मेह बरस रह्यो है। पाली जिला रा केई हलकां मांय दोपहरां री बगत व्ही बिरखा ऊं पाणी भर ग्यो। श्रीगंगानगर अर डूंगरपुर मांय ई केई ठौड़ां बिरखा रा समाचार है। कोटा मांय ई सिंज्यां री पोर जोरदार पाणी बरस्यो। लारला 24 घंटा मांय जयपुर, धौलपुर जिला रा राजाखेड़ा अर झालावाड़ जिला रा गंगधार मांय जोरदार मेह बरस्यो। जैसलमेर मांय बिरखा रूक्यां पाछे हाल ई केई गांवां मांय पाणी भर्यो है, जिण ने निकाळबा सारु जिला प्रशासन कोशिश कर रह्यो है। करौली मांय ई सिंज्यां री पोर मेह बरस्यो। मौसम विभाग रे मुजब राज्य रा ऊगणी हलकां मांय आवता एक सप्ताह तांई चौमासा री बिरखा चालती रेहवण रा आसार है। ई दौरान भरतपुर, जयपुर, अजमेर, कोटा अर उदयपुर संभाग रा कुछ हलकां मांय तेज बारिश री संभावना है। कोटा, उदयपुर अर जयपुर संभाग रा जिलां मांय आवता 5—6 दिन कठे—कठे भारी बारिश रा आसार है। कोटा अर उदयपुर संभाग रा कुछ हलकां मांय 25 अर 26 अगस्त ने भारी बारिश रा आसार है। जोधपुर अर बीकानेर संभाग रा कुछ हलकां मांय आवता दो—तीन दिन कठे—कठे हल्की ऊं मझला दर्जा री बिरखा रा आसार है।

000

भीलवाड़ा रेलवे टेशन माथे अमृत स्टेशन योजना रा तहत न्यारा—न्यारा काम कर्या जा रह्या है। अजमेर रा वरिष्ठ मंडल वाणिज्य प्रबंधक सुनील कुमार महला बतायो के ई योजना रा तैत भीलवाड़ा टेशन माथे 15 करोड़ 71 लाख रुप्या रा खर्च ऊं विकास रा काम कराया जा रह्या है। हाल तांई दूजी तरफ ऊं स्टेशन मांय दाखिल व्हेवण रा गेला माथे इमारत बणावण रो काम पूरो व्हे ग्यो है अर रिजर्वेशन अर बुकिंग ऑफिस चालू कर दिया ज्या है।

000

प्रधानमंत्री नरेन्द्र मोदी ई महीना री 25 तारीख, दीतवार ने आकाशवाणी ऊं प्रसारित कर्या जावण वाळा खास कार्यक्रम **मन की बात** मांय विचार बतावेला। आ हर महीना प्रसारित कर्या जावण वाळा ई कार्यक्रम री 113वीं कड़ी व्हेला। ई सारू आप मुफ्त नम्बर 1800 11 7800 माथे 23 तारीख तांई विचार अर राय भेज सको हो। इण रे अलावा नरेन्द्र मोदी एप अर माई जीओवी ओपन फोरम माथे ई विचार बताया जा सके है।

000